



REPUBLIKA E KOSOVËS / REPUBLIKA KOSOVA

CN.nr.75/2024

GJYKATA SUPREME E KOSOVËS, kolegji i përbërë nga gjyqtarët: Zenel Leku, kryetar, Muhamet Rexha dhe Nenad Lazic, anëtarë, në çështjen juridike përmbartimore të kreditorit P.dhe T. K., Sh.a., me seli në P., kundër debitorit N.SH.Z.T “A”, me seli në V., me objekt kontesti borxh, përkitazi me konfliktin e kompetencës, në seancën e kolegjit të mbajtur më 11.03.2024, merr këtë:

A K T V E N D I M

Për të gjykuar në këtë çështje juridike kompetente në pikëpamje lëndore është Gjykata Themelore Mitrovicë, Dega në Vushtrri, të cilës shkresat e lëndës i dërgohen në kompetencë të mëtejme.

A r s y e t i m i

Gjykata Themelore në Mitrovicë, Dega Vushtrri, duke vepruar sipas propozimit të kreditorit Posta dhe Telekomunikacioni i Kosovës Sh.a., me aktvendimin CP.nr.180/19 të datës 26.06.2019, ka lejuar përmbartimin ndaj debitorit N.SH.Z.T “A”, për ekzekutimin e borxhit në lartësi prej 202.70 €.

Ndaj këtij aktvendimi debitori ka paraqitë kundërshtim, ndërsa Gjykata Themelore në Mitrovicë, Dega Vushtrri, me aktvendimin CP.nr.180/19 të datës 18.07.2019 ka refuzuar si të pabazuar prapësimin e debitorit dhe ka vërtetuar aktvendimin për lejimin e përmbartimit CP.nr.180/19 të datës 26.06.2019. Ndaj aktvendimit të lartcekur debitori ka paraqitë ankesë, ndërsa Gjykata e Apelit me aktvendimin Ac.nr.2080/20 të datës 11.01.2021 ka refuzuar ankesën e debitorit si të

pathemeltë, ndërsa ka vërtetuar aktvendimin e Gjykatës Themelore në Mitrovicë, Dega Vushtrri, CP.nr.180/19 të datës 18.07.2019.

Pasi që aktvendimi mbi lejimin e përmbarimit ka marrë formë të prerë, Gjykata Themelore në Mitrovicë, Dega Vushtrri, me aktvendimin CP.nr.180/19 të datës 12.10.2023, në pikën I të dispozitivit është shpallur jo kompetente në pikëpamje lëndore, për të vendosur në këtë çështje juridike përmbarimore të kreditorit Posta dhe Telekomunikacioni i Kosovës Sh.a., me seli në P., kundër debitorit N.SH.Z.T “A”, me seli në V., ndërsa në pikën II të dispozitivit është vendosur që pasi që ky aktvendim të merr formë të prerë, lënda i dërgohet Gjykatës Komerciale të Kosovës, Dhomat e Shkallës së Parë, Departamentit për Çështje Ekonomike në Prishtinë.

Gjykata Komerciale e Kosovës, Dhomat e shkallës së parë, Departamenti për Çështje Ekonomike me aktvendimin KPPP.nr.1942/23 të datës 07.02.2024, në pikën I të dispozitivit ka vendosur që të hapë konflikt kompetence në mes të Gjykatës Komerciale të Kosovës, Dhomat e Shkallës së Parë, Departamenti për Çështje Ekonomike dhe Gjykatës Themelore në Mitrovicë - Dega Vushtrri, për të vendosur në këtë çështje përmbarimore në mes të kreditorit Posta dhe Telekomunikacioni i Kosovës Sh.a., dhe debitorit N.SH.Z.T “A”. Në pikën II të dispozitivit është vendosur që për të vendosur lidhur më konfliktin e kompetencës lënda i dërgohet Gjykatës Supreme të Kosovës.

Gjykata Supreme e Kosovës, ka vlerësuar se në këtë rast kemi të bëjmë me konfliktin e kompetencës midis gjykatave të ndryshme të cilin e zgjidh Gjykata Supreme e Kosovës, bazuar në nenin 25.2 të LPK-së dhe nenin 13 pika 7 të Ligjit Nr.08/L-015 Për Gjykatën Komerciale.

Nga shkresat e lëndës rezulton se kreditori, Posta dhe Telekomunikacioni i Kosovës Sh.a., me seli në P., më datë 21.06.2019 ka parashtruar propozim për përmbarim në Gjykatën Themelore në Mitrovicë - Dega Vushtrri, me të cilin ka kërkuar që të detyrohet debitori N.SH.Z.T “A”, me seli në V., që t’ia paguaj shumën prej 202.70 €. Gjykata ka lejuar propozimin për përmbarim të paraqitur nga kreditori, ndërsa me aktvendimin CP.nr.180/19 të datës 18.07.2019 ka refuzuar si të pabazuar prapësimin e debitorit, e po ashtu Gjykata e Apelit ka refuzuar të pathemeltë ankesën e debitorit dhe ka vërtetuar aktvendimin e lartcekur të shkallës së parë. Gjykata Themelore në Mitrovicë, Dega Vushtrri ka nxjerrë aktvendimin CP.nr.180/19 të datës 12.10.2023, me të cilin është shpallur jokompetente në pikëpamje lëndore dhe lëndën ia ka dërguar Gjykatës Komerciale të Kosovës për vendosje.

Gjykata Supreme e Kosovës vlerëson se në këtë çështje juridike me kompetencë lëndore për të gjykuar është Gjykata Themelore në Mitrovicë, Dega në Vushtri, për këto arsye:

Me nenin 1 të Ligjit për Procedurën Përmbaremore, përcaktohet se: *“Ky ligj rregullon procedurën përmes së cilës Gjykatat dhe përmbaruesit privat përcaktojnë dhe zbatojnë përmbarimin në bazë të dokumenteve përmbarues dhe dokumenteve të besueshme, përveç nëse me ligj të veçantë parashihet ndryshe.”* Me nenin 12 paragrafi 1 të Ligjit për Gjykatat nr.06/L-054, i shpallur në Gazetën Zyrtare nr. 22, datë 18 dhjetor 2018, parashihet që: *“Gjykatat themelore janë kompetente për të gjykuar në shkallë të parë të gjitha çështjet, përpos nëse me ligj parashihet ndryshe”*. Me nenin 13 paragrafi 1 të Ligjit për Gjykatën Komerciale, përcaktohet se: *“Gjykata Komerciale është kompetente për të gjykuar, dhe ka juridiksion ekskluziv për të gjykuar, në Dhomat e Shkallës së Parë dhe Dhomat e Shkallës së Dytë: 1.1. kontestet ndërmjet shoqërive tregtare vendore dhe të huaja, si dhe kontestet ndërmjet personave juridikë publikë dhe privat, në lidhje me çështjet e ndërsjella tregtare dhe çështje tjera mes tyre, dhe 1.2. të gjitha mjetet juridike, siç përcaktohet me ligjin e aplikueshëm për procedurën përmbaremore, për çështje brenda kompetencës të kësaj gjykate”*.

Gjykata Supreme vlerëson se në këtë rast me kompetencë lëndore për të vendosur në këtë çështje juridike-përmbaremore është Gjykata Themelore në Mitrovicë, Dega në Vushtri, për faktin se debitori në këtë çështje përmbaremore kur është lejuar përmbarimi dhe lënda ka qenë në Gjykatën Themelore në Mitrovicë, Dega në Vushtri edhe pse ka paraqitë prapësim, e njëjta gjykatë, me aktvendimin CP.nr.180/19 të datës 18.07.2019 ka refuzuar si të pabazuar prapësimin e debitorit dhe ka vërtetuar aktvendimin për lejimin e përmbarimit CP.nr.180/19 të datës 26.06.2019. Ndaj aktvendimit të lartcekur debitori ka paraqitë ankesë, ndërsa Gjykata e Apelit me aktvendimin Ac.nr.2080/20 të datës 11.01.2021 ka refuzuar ankesën e debitorit si të pathemeltë, ndërsa ka vërtetuar aktvendimin e Gjykatës Themelore në Mitrovicë, Dega Vushtri, CP.nr.180/19 të datës 18.07.2019. Po ashtu Gjykata Themelore në Mitrovicë, Departamenti i Përgjithshëm, me aktvendimin e datës 15.04.2021 ka urdhëruar Ministrinë e Financave, Departamentin e Thesarit që nga llogaria e debitorit të bartë mjetet monetare në llogarinë e kreditorit, e pastaj me aktvendimin e lartcekur është shpallur jokompetente për të vendosur. Pasi që në rastin konkret kreditori nuk ka kërkuar që lënda të kalojë te përmbaruesi privat ashtu siç është përcaktuar me nenin 397 të LPP-së, andaj Gjykata Themelore në Mitrovicë, Departamenti i Përgjithshëm, mbi bazën e këtyre

rrethanave nuk ka mundur të shpallet jo kompetente në pikëpamje lëndore por është dashur të vazhdoj në trajtimin e rastit.

Pasi që për mjetet juridike të paraqitura është vendosur nga gjykatat e instancave më të ulëta, andaj sipas vlerësimit edhe të Gjykatës Supreme kjo çështje përmbartimore, nuk është në kompetencë të Gjykatës Komerciale.

Gjykata Supreme e Kosovës, pas shqyrtimit të shkesave të lëndës e bazuar në dispozitat e lartcekura, gjeti se gjykatë me kompetencë lëndore për të vendosur sipas propozimit për përmbartim është Gjykata Themelore Mitrovicë, Dega në Vushtrri.

Nga sa u tha më lart, e në kuptim të dispozitës së nenit 25.2 të LPK, u vendos si në dispozitiv të këtij aktvendimi.

GJYKATA SUPREME E KOSOVËS – PRISHTINË

CN.nr.75/2024, datë 11.03.2024

Kryetari i kolegjit - gjyqtari
Zenel Leku